



## ԴԻՏՈՐԴՆԵՐԻ ՎԱՐՔԱԳԾԻ ԿԱՆՈՆՆԵՐ «Քաղաքացիական երիտասարդական կենտրոն» հասարակական կազմակերպություն

Ք. Իջևան  
Հաստատված է 10 ապրիլի, 2026թ.

### 1. Ընդհանուր դրույթներ

Սույն վարքագծի կանոնները սահմանում են «Քաղաքացիական երիտասարդական կենտրոն» հասարակական կազմակերպության (այսուհետ՝ Քաղաքացիական երիտասարդական կենտրոն ՀԿ) կողմից հավատարմագրվող դիտորդների գործունեության, վարքագծի և էթիկական չափանիշների շրջանակը՝ Հայաստանի Հանրապետության ընտրական գործընթացների դիտարկման ընթացքում:

Փաստաթուղթը մշակված է Հայաստանի Հանրապետության ընտրական օրենսգրքի (այսուհետ՝ Օրենսգրք), ինչպես նաև միջազգային ընտրական դիտարկման սկզբունքների, մասնավորապես՝ ԵԱՀԿ/ԺՀՄԻԳ (OSCE/ODIHR) դիտորդների վարքագծի կանոնների հիման վրա:

Քաղաքացիական երիտասարդական կենտրոն ՀԿ-ն և նրա դիտորդները պարտավոր են սույն կանոնները պահպանել հավատարմագրման դիմումը Կենտրոնական ընտրական հանձնաժողով ներկայացնելու պահից մինչև դիտորդական առաքելության ավարտը:

### 2. Դիտորդական չեզոքություն

Քաղաքացիական երիտասարդական կենտրոն ՀԿ-ն և նրա դիտորդները պարտավոր են պահպանել քաղաքական չեզոքություն՝ համաձայն Օրենսգրքի պահանջների:

Կազմակերպությունը և նրա դիտորդները չեն կազմակերպում և չեն իրականացնում քարոզչություն կամ հակաքարոզչություն, չեն արտահայտում կանխակալ կամ կողմնակալ դիրքորոշումներ և չեն դրսևորում նախապատվելի վերաբերմունք որևէ թեկնածուի, ընտրություններին մասնակցող կուսակցության կամ կուսակցությունների դաշինքի նկատմամբ:

Դիտորդական չեզոքության պահանջը տարածվում է նաև Քաղաքացիական երիտասարդական կենտրոն ՀԿ-ն ներկայացնելու լիազորություն ունեցող անձանց, ինչպես նաև կառավարման մարմինների անդամների վրա (բացառությամբ ժողովի անդամների):

Քաղաքացիական երիտասարդական կենտրոն ՀԿ-ն ապահովում է, որ իր բոլոր դիտորդները նախապես ստորագրեն չեզոքության և վարքագծի կանոնների պահպանման պարտավորություն:

Սույն պահանջների խախտման դեպքում կազմակերպության հավատարմագրումը կարող է ճանաչվել ուժը կորցրած՝ Օրենսգրքով սահմանված կարգով:

### **3. Դիտորդների կարգավիճակն ու պարտականությունները**

Քաղաքացիական երիտասարդական կենտրոն ՀԿ-ի դիտորդները գործում են որպես անկախ և չեզոք դիտորդներ և պարտավոր են պահպանել Օրենսգրքի պահանջները:

Դիտորդները պարտավոր են՝

- գրանցվել ընտրական հանձնաժողովի գրանցամատյանում՝ նիստերին և քվեարկության ընթացքում ներկա գտնվելու համար,
- կրել Կենտրոնական ընտրական հանձնաժողովի կողմից տրամադրված սահմանված նմուշի վկայականը՝ տեսանելի ձևով,
- պահպանել քաղաքավարի, զուսպ և պրոֆեսիոնալ վարքագիծ:

Դիտորդները պարտավոր են լինել անկողմնակալ և չեզոք՝ չարտահայտելով կանխակալ կամ կողմնակալ դիրքորոշում որևէ քաղաքական ուժի նկատմամբ:

Դիտորդները իրավունք չունեն միջամտելու ընտրական հանձնաժողովների աշխատանքներին, ներառյալ՝ հանձնաժողովի անդամներին ցուցումներ տալը կամ նրանց գործողությունների վրա ազդեցություն գործադրելը:

### **4. Դիտորդների իրավունքները**

Օրենսգրքին համապատասխան Քաղաքացիական երիտասարդական կենտրոն ՀԿ-ի դիտորդներն իրավունք ունեն՝

- ներկա գտնվել ընտրական հանձնաժողովների նիստերին, իսկ քվեարկության ընթացքում՝ նաև քվեարկության սենյակում,
- հետևել քվեաթերթիկների և ինքնաստսնձվող դրոշմանիշերի տպագրման, փոխադրման, պահպանման և հաշվարկման գործընթացներին՝ ԿԸՀ սահմանած կարգով,
- ծանոթանալ ընտրական փաստաթղթերին և կատարել քաղվածքներ կամ ստանալ պատճեններ՝ օրենքով սահմանված սահմանափակումներով,
- տեղամասային կենտրոնում, հանձնաժողովի ներկայացուցչի ներկայությամբ, ծանոթանալ համապատասխան փաստաթղթերին՝ չխաթարելով ընտրական գործընթացը,
- ազատ տեղաշարժվել քվեարկության սենյակում՝ դիտարկման նպատակով,
- լուսանկարել և տեսանկարահանել ընտրական գործընթացը՝ պահպանելով քվեարկության գաղտնիությունը,

- դիմել ընտրական հանձնաժողովին՝ իրենց դիտարկումները համապատասխան գրանցամատյանում արձանագրելու նպատակով,
- հրապարակայնորեն արտահայտել կարծիք ընտրությունների կազմակերպման և անցկացման վերաբերյալ՝ պահպանելով չեզոքության սկզբունքը:

Լուսանկարումը և տեսանկարահանումը չեն կարող ուղղված լինել ընտրողների նույնականացմանը կամ ընտրողների ցուցակների և քվեարկության կտրոնների տվյալների արձանագրմանը: Քաղվածքներ կատարել կամ լուսանկարել քվեարկությանը մասնակցած ընտրողների ցուցակները և քվեարկության կտրոնները արգելվում է:

## 5. Վարքագիծ ընտրական գործընթացի ընթացքում

Քաղաքացիական երիտասարդական կենտրոն ՀԿ-ի դիտորդները պարտավոր են իրենց գործունեությունը կազմակերպել այնպես, որ չխաթարեն ընտրական հանձնաժողովների բնականոն աշխատանքը և քվեարկության ընթացքը:

Դիտորդներին արգելվում է՝

- իրականացնել քարոզչություն,
- միջամտել ընտրական գործընթացին,
- ազդեցություն գործադրել ընտրողների կամ հանձնաժողովի անդամների վրա:

Դիտորդի կողմից Օրենսգրքի պահանջների խախտման դեպքում ընտրական հանձնաժողովի նախագահը կարող է նրան հեռացնել տեղամասից կամ նիստից՝ հանձնաժողովի անդամների ընդհանուր թվի առնվազն երկու երրորդի ձայներով ընդունված որոշմամբ:

## 6. Խախտումների արձագանքման կարգը

Դիտորդները պարտավոր են արձանագրել խախտումները փաստերի հիման վրա և չմիջամտել դրանց ուղղակիորեն:

Դիտորդները կարող են իրենց դիտարկումները ներկայացնել ընտրական հանձնաժողովին և դիմել դրանց գրանցման համար:

Բոլոր դեպքերում դիտորդները պարտավոր են անհապաղ հաղորդել արձանագրված խախտումները Քաղաքացիական երիտասարդական կենտրոն ՀԿ-ի համակարգողներին:

## 7. Հաղորդակցություն և հանրային հայտարարություններ

Դիտորդները կարող են հաղորդակցվել ՋԼՄ-ների հետ և հրապարակայնորեն արտահայտել կարծիք՝ ընտրությունների կազմակերպման և անցկացման վերաբերյալ՝ պահպանելով չեզոքության, օբյեկտիվության և փաստերի վրա հիմնված լինելու սկզբունքները:

Քաղաքացիական երիտասարդական կենտրոն ՀԿ-ի անունից պաշտոնական դիրքորոշումները ներկայացվում են միայն լիազորված ներկայացուցիչների կողմից:

## **8. Սոցիալական մեղիայի օգտագործում**

Դիտորդները պարտավոր են սոցիալական մեղիայում պահպանել չեզոքություն և զերծ մնալ այնպիսի հրապարակումներից, որոնք կարող են խաթարել ընտրական գործընթացի վստահելիությունը կամ խախտել քվեարկության գաղտնիությունը:

## **9. Գաղտնիություն և տվյալների պաշտպանություն**

Դիտորդները պարտավոր են ապահովել անձնական տվյալների պաշտպանությունը և պահպանել իրենց գործունեության ընթացքում ստացված տեղեկատվության գաղտնիությունը՝ ՀՀ օրենսդրությամբ սահմանված կարգով:

## **10. Դիտորդների լիազորությունների սևտությունը**

Դիտորդների լիազորությունները դադարում են ընտրությունների արդյունքների պաշտոնական հրապարակումից հետո ութերորդ օրը, եթե արդյունքները դատարան չեն բողոքարկվել:

Դատական բողոքարկման դեպքում լիազորությունները ավարտվում են դատական ակտի հրապարակման օրվա հաջորդ օրը, եթե չի նշանակվել ընտրության երկրորդ փուլ կամ վերաքվեարկություն:

Երկրորդ փուլի կամ վերաքվեարկության դեպքում դիտորդների կրկին հավատարմագրում չի պահանջվում:

## **11. Պատասխանատվություն**

Սույն կանոնների և Օրենսգրքի պահանջների խախտումը կարող է հանգեցնել դիտորդի լիազորությունների դադարեցման, ինչպես նաև Քաղաքացիական երիտասարդական կենտրոն ՀԿ-ի հավատարմագրման ուժը կորցրած ճանաչման:

## **12. Միջազգային չափանիշներ**

Քաղաքացիական երիտասարդական կենտրոն ՀԿ-ն իր դիտորդական առաքելությունն իրականացնում է նաև միջազգային չափանիշներին համապատասխան, մասնավորապես՝ առաջնորդվելով ԵԱՀԿ/ԺՀՄԻԳ (OSCE/ODIHR) «Դիտորդների վարքագծի կանոններով» և ընտրական դիտարկման միջազգային լավագույն փորձով:

### 13. Դիտորդների պատրաստվածություն և ուսուցում

Քաղաքացիական երիտասարդական կենտրոն ՀԿ-ն հաստատում է, որ իր կողմից հավատարմագրման ներկայացվող դիտորդների համար ընդունված են սույն վարքագծի կանոնները, որոնք պարտադիր են բոլոր դիտորդների համար:

Կազմակերպությունը նաև հավաստում է, որ հավատարմագրման ներկայացվող բոլոր դիտորդները նախապես մասնակցել են համապատասխան ուսուցման, որը ներառում է Հայաստանի Հանրապետության ընտրական օրենսդրության, ընտրական գործընթացների, դիտորդների իրավունքների և պարտականությունների, ինչպես նաև սույն վարքագծի կանոնների մանրամասն ներկայացում:

Ուսուցման շրջանակում դիտորդներին տրամադրվել են անհրաժեշտ գիտելիքներ և գործնական հմտություններ՝ ընտրական գործընթացի արդյունավետ, անկողմնակալ և օրենսդրությանը համապատասխան դիտարկում իրականացնելու համար:

Քաղաքացիական երիտասարդական կենտրոն ՀԿ-ն ապահովում է, որ իր կողմից ներգրավված դիտորդները լիարժեք պատկերացում ունեն իրենց լիազորությունների, սահմանափակումների և պատասխանատվության վերաբերյալ և պատրաստ են իրականացնել դիտորդական առաքելությունը բարձր պրոֆեսիոնալ և էթիկական չափանիշներին համապատասխան:

### 14. Եզրափակիչ դրույթներ

Սույն վարքագծի կանոնները պարտադիր են Քաղաքացիական երիտասարդական կենտրոն ՀԿ-ի կողմից հավատարմագրվող բոլոր դիտորդների համար:

Դիտորդները պարտավոր են նախապես ծանոթանալ սույն փաստաթղթին և իրենց գործունեությունը իրականացնել դրանում սահմանված սկզբունքներին համապատասխան:

Քաղաքացիական երիտասարդական կենտրոն ՀԿ-ն ապահովում է դիտորդների համապատասխան պատրաստվածությունը՝ բարձր որակի և վստահելի դիտորդական առաքելություն իրականացնելու նպատակով: